

七十二家集

吳朝請集引

吳庠作小賦及與人書談山水間
事如列畫圖至乃寄興特于俳
諧則子刑顏責之變聲而廣義
麟賦之後動文中子謂其文怪以
怨殆指是乎若夫以詩名世以

人標為吳均體清拔之氣按節
可覆也昔班孟堅以私史見譴
翻以史見收殊庠齊春秋一
竟不復振通史未就齊志乃
冥惜矣他作如續齊諧尚存
東祀隋經籍志亦稱為均筆然

參傳序均撰述却不列此書
又西陽雜俎稱庾信云西京雜
記是吳均語不足効隨成武去
古匪遠未應誤傳然雜記故爲
洪所牽綴於劉歆也移之吳均
亦無的據此俱不可解者聊

識以賢于通人

張燮識

陳正學書

吳朝請集目錄

卷一

賦

吳城賦

八公山賦

碎珠賦

橘賦

筆格賦

樂府

戰城南

又

又

雉子班

入關

梅花落

城上烏

從軍行

胡無人行

雉朝飛操

渡易水歌

結客少年場

妾安所居

送歸曲

夾樹

城上麻

擬古四首

陌上桑

秦王卷衣

采蓮曲

攜手曲

采蓮曲

三婦豔詩

大垂手

小垂手

有所思

雍臺

楚妃曲

白浮鴈

陽春歌

別鶴

淶水曲

綠竹

行路難五首

卷二

詩

王侍中夜集

登鍾山燕集望西靜壇

與柳惲相贈答六首

柳惲贈吳均三首附

答柳惲

柳惲贈吳均二首附

贈柳真陽

贈任黃門二首

酬蕭新浦王洗馬二首

答蕭新浦

蕭子雲贈吳均附

酬周叅軍

贈杜容成

贈朱從事

贈姚郎

贈王桂陽別三首

酬別江主簿屯騎

酬別

贈別新林

發湘州贈親故別三首

同柳吳興烏亭集送柳舍人

同柳吳興何山集送劉餘杭

送柳吳興竹亭集

初至壽春作

登壽陽八公山

壽陽還與親故別

邊城將四首

秋念

春怨

采藥大布山

贈周散騎興嗣二首

贈周興嗣四首

周興嗣答吳均詩三首附

入蘭室贈王治書僧孺

江上酬鮑幾

贈柳秘書

諸周承不值因贈此詩

遙贈周承

周承未還重贈

贈王桂陽

酬郭臨丞

憶費景

酬聞人侍郎別三首

贈鮑春陵別

別王謙

奉使廬陵

迎柳吳興道中

卷三

詩

至湘洲望南嶽

登二妃廟

詠懷二首

古意七首

閨怨二首

去妾贈前夫

詠少年

詠雪

雪

春詠

共賦韻詠庭中桐

詠柳

主人池前鶴

寶劍

詠燈

別夏侯故章

以服散鎗贈殷鈞

梅花

征客

雜句四首

山中雜詩三首

詠雲二首

詠慈姥磯石上松

送呂外兵

傷友

表

爲建安讓加司徒表

書

與朱元思書

與顧章書

與施從事書

檄

檄江神責周穆王壁文

食移

說

簡說

連珠

連珠二首

附錄

吳均傳

陳姚察

吳均傳

唐李延壽

和吳主簿六首

梁王筠

春日二首

秋夜二首

遊望二首

遺事

集評

糾謬

巖棲賦

竹賦

吳朝請集卷之一

梁吳興吳均叔庠著

明閩漳張爕紹和纂

賦

吳城賦

古樹荒煙幾百千年云是吳王所築越王所遷
東有鑄劍殘水西有舞鶴故壘繁具區之廣澤
帶姑蘇之遠山僕本蓄怨千悲億恨况復荆棘
蕭森叢蘿彌蔓亭梧百尺皆歷地而生枝階筠

萬丈或至杪而無葉不見春荷夏槿唯聞秋蟬
冬蝶木魅晨走山鬼夜驚不知九州四海乃復
有此吳城

八公山賦

峻極之山蓄聖表僊南參差而望越北邈迤而
懷燕爾其盤桓基固含陽藏霧絕壁嶮巖層巖
廻互挂皎月而常團雲望空而自布袖以華閨
帶以潛淮文星亂石藻日流堦若夫神基巨鎮
而卓犖荆河箕風畢雨育嶺生戕高岑直兮蔽
景脩坂出兮架天以迎雲而就日若從漢而廻
山露沄葉而原淨花照磯而岫鮮促嶂萬尋平
崖億絕上被紫而煙生傍帶花而來雪維英王

今好僊會八公兮小山駕飛龍兮翩翩高馳翔
兮冲天

碎珠賦

寶月生焉越浦隋川標魏之美擅楚之賢既登
席而趨麗亦綴履而升妍豈銜恩以赴時獨佩
皎而騰天瀛淮激電甘海震雷明珠碎矣于川
之隈視員流而失轉見折水之亡迴謝驪宮之
瑞飾粉靈蚌之神胎若有人兮聲芒昧芳微斷
兮明珠碎明珠碎兮愴何宜珠之形兮不復全
撫陸離之瓊珮弔幽翳之金筵豈照車與璿燭
但黃塵及寒煙聊歌曰玉山之津兮已濡幽蘭

之草今亦舒又聞珩璧之獨照不見掌上之明珠已矣哉若使青雲之可尚當與碎珠之同棲

橘賦

增枝之木旣稱英於綠地金衣之果亦委體於
玉盤見雲夢之千樹笑江陵之十蘭葉葉之雲
共琉璃而並碧枝枝之日與金輪而共丹若乃
飈夜初露長郊欲素風賁寒而壯來鴈銜霜而
南渡方散藻於平深遂凝貞於冬暮

筆格賦

幽山之桂樹恒縈風而抱霧葉委鬱而陸離根
縱橫而盤互爾其負霜含液枝翠心赤翦其匡
條爲此筆格趺■則巖巖方爽似華山之孤生
上管則員員峻逸若九疑之爭出長對坐而銜
煙永臨窓而儲筆

樂府

戰城南

蹀躞青驪馬往戰城南
畿五歷魚麗陣三入九
重圍名習武安將血汗
秦王衣爲君意氣重無
功終不歸

又

此與下篇藝文失題列戰城南
南後英華遂以爲題當再考

前有濁樽酒

一作酒尊

憂思亂紛紛

一作少年

重意

氣學劍不學文忽值胡關靜
匈奴遂兩分天山
已半出龍城無片雲
漢世平如此何用李將軍

又

陌上何諠諠匈奴圍塞垣黑雲藏趙樹黃塵埋

隴垠天子羽書勞將軍在玉門

闕

雉子班

可憐雉子班群飛集野甸文章始陸離意氣已
驚狷幽并遊俠子直心亦如箭生死報君恩誰
能孤恩眄

入關

羽檄起邊庭烽火亂如螢是時張博望夜赴交

河城馬頭要落日
劍尾掣流星
君恩未得報
何諭身命傾

梅花落

終冬十二月寒風西北吹
獨有梅花落飄蕩不
依枝流連逐霜彩
散漫下冰澌
何當與春日共
映芙蓉池

城上烏

嗚嗚城上烏
翩翩尾畢逋
凡生八九子
夜夜啼相呼
質微知慮少
體賤毛衣麤
陛下三萬歲
臣

至執金吾

從軍行

男兒亦可憐立功在壯邊
陣頭橫却月馬腹帶
連錢懷戈發隴坻
乘凍至遼川微誠言不愛終
自直如弦

胡無人行

劍頭利如芒恒持照眼光
鐵騎追驍虜金羈討
黠羗高秋八九月胡地早風霜
男兒不惜死破
膽與君嘗

雉朝飛操

二月雉朝飛橫行傍隴歸斜看水外翟側聽嶺
南翬蹊蹊恒欲戰耿耿恃彊威當令君見賞何
辭碎錦衣

渡易水歌

襍虜客來齊時余在角觝揚鞭渡易水直至龍
城西日昏笳亂動天曙馬爭嘶不能通瀚海無
面見三齊

結客少年場

結客少年歸翩翩駿馬肥報恩殺人竟賢君賜
錦衣握蘭登建禮拖玉入含輝顧看草玄者功
名終自微

妾安所居

賤妾先有寵蛾眉進不遲一從西北麗無復城

南期何因

一作用

暫豔逸豈爲乏妍姿徒有黃昏

望寧遇青樓時惟惜應門掩方餘永巷悲匡牀
終不哭何由橫自私

送歸曲

送子獨雨歸攬衣空惘然關山畫欲暗河冰夜
向塞燕至他人鄉鴈去還誰國寄子兩行書分
明達濟北

夾樹

桂樹夾長陂復值清風吹氛氲揉芳葉連綿交
密枝能迎春露點不逐秋風移願君長惠愛當
使歲寒知

城上麻

麻生蒲城頭麻葉落城溝麻莖左右披溝水東

西流少年感恩命奉劍事西周但令直心盡何
用返封侯

擬古四首

陌上桑

嫋嫋陌上桑蔭陌復垂塘長條映白日細葉隱
鸝黃蠶饑妾復思拭淚且提筐故人寧知此離
恨煎人腸

秦王卷衣

咸陽春草芳秦帝卷衣裳玉檢茱萸匣金泥蘇

合香初芳薰複帳餘輝耀玉牀當須宴明麗將

此贈華陽

一作龍陽

采蓮曲

錦帶襍花鈿羅衣垂綠川問子今何去出采江南
蓮遼西三千里欲寄無因緣願君早旋返及
此荷花鮮

攜手曲

豔裔陽之春攜手清洛濱雞鳴上林苑薄暮小
平津長裾藻白日廣袖帶芳塵故交一如此新

知詎憶人

采蓮曲

初學作
元帝

江風當夏

一作夜

清桂檝

一作權

逐流縈初疑京兆

劍復似漢冠名荷香帶風遠蓮影向根生葉卷

珠難溜花舒紅易傾日暮鳬舟滿歸來度錦城

三婦豔詩

大婦弦初切中婦管方吹少婦多姿態含笑逼

清卮佳人勿餘及殷勤妾自知

大垂手

以下二首藝
文作簡文帝

垂手忽迢迢。飛燕掌中嬌。羅衫恣風引，輕帶任情搖。詎似長沙地，促舞不回腰。

小垂手

舞女出西秦。躡影舞陽春。且復小垂手，廣袖拂紅塵。折腰應兩笛，頓足轉雙巾。蛾眉與曼臉，見此空愁人。

有所思

薄暮有所思，終持淚煎骨。秦風驚我心，秋露傷君髮。

雍臺

雍臺十二樓樓樓鬱相望隴西飛狐口白日盡
無光

楚妃曲

春妝約春黛如月復如蛾玉釵照繡領金薄厠
紅羅

白浮鳩

瑯琊白浮鳩紫翳飄陌頭食飲東莞野棲宿越
王樓

陽春歌

紫苔初泛水連綿浮且漫着欲歌陽春先歌青

樓月

別鶴

別鶴尋故侶聯翩遼海間單棲孟津水驚唼隴

頭山

漲水曲

香暖金堤蒲湛淡春塘溢已送行臺花復倒高

樓日

綠竹

嬋娟鄣綺殿繞弱拂春漪何當逢採拾爲君笙
與篴

行路難五首

洞庭水上一株桐經霜觸浪困嚴風昔時抽心
耀白日今旦卧死黃沙中洛陽名工見咨嗟一
剪一刻作琵琶白壁規心學明月珊瑚映面作
風花帝王見賞不見忘提携把握登建章掩抑
摧藏張女彈殷勤促柱楚明光年年月月對君

子遙遙夜夜宿未央未央綵女棄鳴篴爭先拂
拭生光儀茱萸錦衣玉作匣安念昔日枯樹枝
不學衡山南嶺桂至今千載猶未知

青瑣門外安石榴連枝接葉夾御溝金墉城西
合歡樹垂條照彩拂鳳樓遊俠少年游上路傾
心傾倒想戀慕摩頂至是謂片言開胸瀝膽取
一顧自言家在趙邯鄲翩翩古杪復劍端青驪
白駿的盧馬金羈綠鞵紫絲鞚躑躅橫行不肯
進夜夜汗血至長安長安城中諸貴臣爭貴儒

者席上珍復聞梁王好學問輕棄劍客如埃塵
吾丘壽王始得意司馬相如適被申大才大辯
尚如此何況我輩輕薄人

君不見西陵田從橫十字成陌阡君不見東郊
道荒涼蕪沒起寒煙盡是昔日帝王處歌姬舞
女達天曙今日翩妍少年子不知華盛落前去
吐心吐氣許他人今旦迴惑生猶豫山中桂樹
自有枝心中方寸自相知何言歲月忽若馳君
之情意與我離還君玳瑁金雀釵不忍見此使

心危

君不見長安客舍門倡家少女名桃根貧窮夜
紡無燈燭何言一朝奉至尊至尊離宮百餘處
千門萬戶不知曙唯聞啞啞城上烏玉欄金井
牽轆轤丹梁翠柱飛流蘇香薪桂火炊雕胡一作
彫當當年翻覆無常定薄命爲女何必羸樂府王
湘
帶

君不見上林苑中客冰羅霧縠象牙席盡是得
意忘言者探腸見膽無所惜白酒甜鹽耳如乳

綠縴皎鏡華如碧少年持名不肯嘗安知白駒
應過隙轉出鑪中百和香鬱金蘇合及都梁透
迤好氣佳容貌經過青瑣歷紫房已入中山馮

玉璽
作陰

后帳復上皇帝班姬牀班姬失寵顏不開

奉帚俱養長信臺日暮耿耿不能寐秋風切切
四面來玉階行路生細草金鑪香爇變成灰得
意失意湏臾頃

一作
間

非君方寸逆所裁

吳朝請集卷之二

梁吳興吳均叔庠著

明閩漳張燮紹和纂

詩

王侍中夜集

抽蘭開石路剪竹製山扉
文淪見綠水參差隱翠微
西山採藥至東都謝病歸
紡毛織野服縫芟作山衣
欲知三青鳥簷上素雲飛

登鍾山燕集望西靜壇

客思何以緩春郊
滿初津高車陸離至駿騎差
池出寶碗汎蓮花
珍杯食竹實才勝商山四文
高竹林七復望子
喬壇金繩蘊綠帙風雲生屋
宇芝映被仙室
方隨鳳凰去悠然駕白日

與柳惲相贈答六首

黃驪飛上苑綠芷出汀洲
日映昆明水春生鵝鵲樓
飄颺白花舞瀾漫紫萍流
書織迴文錦無因寄隴頭
思君甚瓊樹不見方離憂

鳴鞭適大阿聯翩渡漳河
燕姬及趙女挾瑟夜

經過纖腰曳廣袖半額畫長蛾客本倦遊者
集
帶在江沱故人不可棄新知空復何

離居苦無樂回慕心悽悽要途訪趙使聞君仕
執珪杜蘅色已發菖蒲葉未齊羃歷蠶餌蜚差
池燕吐泥願逐東風去飄蕩至遼西

白日隱城樓勁風掃寒水離枿隔東西執手異
涼燠相思咽不言洞房清且肅歲去甚流煙年
來如轉軸別鶴千里飛孤雌夜未宿

閒房肅已靜落月有餘輝寒蟲隱壁思秋蛾繞

燭飛絕雲斷更合離禽去復歸佳人今何在
遞江之沂一爲別鶴舞千里淚沾衣

秋雲靜晚天寒夜方綿綿聞君吹瑟管相思
雜承蓮別離未幾日高月三成弦蹀躞黃河
浪嘶唱隴頭絃寄君薜蘿葉插著叢臺邊

柳惲贈吳均三首附

寒雲晦滄洲奔潮溢南浦相思白露亭永望

秋風渚心知別路長誰不

一作

謂若燕楚關候

日遼絕如何

一作

附行旅願作野飛鳥飄然

自輕舉

遠遊濟伊洛秣馬度清漳邯鄲饒

一作有

美女

豔色含春芳鼓瑟未成曲踏履

一作蹀履

復翱翔

我本遊客子情愛在淮陽新知誰不樂念舊
昔人腸

夕宿飛狐關晨登磧磔坂形爲戎馬倦思逐
征旗遠邊城秋霰來寒鄉春風晚始信隴雪
輕漸覺寒雲卷徃役命所當念子加餐飯

答柳惲

清晨發隴西日暮飛狐谷秋月照層嶺寒風掃
高木霧露夜侵衣關山曉催軸君去欲何之參
差間原陸一見終無緣懷悲空滿目

柳惲贈吳均二首附

山桃落晚紅野蕨開初紫雲日自清明蘋芷
齊薜靡離念已鬱陶物華復如此

秋風度關隴楚客奏歸音颯颯避霜葉離離
山塞禽

贈柳真陽

王孫清且貴築室芙蓉池羅生君子樹襍種女
貞枝南牕帖雲母北戶映琉璃銜書輓轡鳳坐
水玉盤臚朝衣茱萸錦夜覆葡萄卮聯翩驟赤
兔窈窕駕青驪龍泉甚鳴利如何獨不知

贈任黃門二首

相如體英彥左右生容輝已紆漢帝組復解梁
王衣經過雲母扇出入千門扉連洲茂芳杜長
山鬱翠微欲言終未敢徒然獨依依

紛吾少馳騁自來乏名德白玉鏤衢鞍黃金瑪

璫勒射鵬靈丘下驅馬鴈門北殷勤盡日攀留
連窮景黑歲暮竟無成憂來坐默默

酬蕭新浦王洗馬二首

蕭子雲封新浦侯
王筠爲太子洗馬

始可結交者文酒滿金壺圍碁帝臺局繫馬秦
王蒲長劍皆玉具短笛悉銀塗送歸日愁滿留
客袂紛吾今成桓山上秋風星散烏

思君出江湄慷慨臨長薄獨對東風酒誰舉指
南酌崇蘭白帶飛青鵝紫纓絡一年流淚同萬
里相思各胡爲舍旃去故人在宛洛

答蕭新浦

僕本二陵徒英豪多父要角觝良家兒期門惡
年少身一作腰紆丈二組手擎尺一詔問子行何

去高帆艤江干今夜杯酒別明朝江水邊莓莓
看細雨漠漠視濃煙颯灑八銅剪低昂五會船
欲知故人者江南共采蓮悵然心不樂跨馬出
城壕觀濤看白鷺望草見青袍青袍行中把蔽
草覆平野公子不垂堂紛紛故交者肘懸臂邪
印屋曜鴛鴦瓦翩翩流水車蕭蕭曳練馬是時

君別我青莎沒馬蹄連連文蠶蜚驚驚伺朝鷄
今日余懷友積恨一作雪滿東西

蕭子雲贈吳均附

欲知健少年本來最輕黠綠沈弓項縱紫艾
刀橫拔誰持命要寵寧知敵可殺有功終不
言明君自應察

酬周叅軍

日暮憂人起倚戶悵無憐水傳洞庭遠風送鴈
門寒江南霜雪重相如衣服單沈雲隱喬樹細

雨滅層巒且當對樽酒朱絃永夜彈

贈杜容成

帝王集作簡文帝詠
燕今從玉臺作吳均

一燕海上來一燕高堂息一朝相逢遇依然舊
相識問余來何遲山川幾紆直答言海路長風
駛飛無力昔別縫羅衣春風初入帷今來夏欲
晚桑扈一作桑蛾薄樹飛

贈朱從事

我行欲何之千里尋膠漆長葭歷渚生踈蒲緣
斧出梟梟能隨風離離堪度日客思已飄蕩相

思復非一未得幸殷勤先作數行泣

贈姚卽

星漢正參差佳人不在斯宿昔暫乖阻何異遠
分離露染薜蘿葉日照芄蘭枝風光已飄薄雲
采復逶迤勞夢無人覺默默心自知

贈王桂陽別三首

昔聞楊伯起拖玉振清風高華積海外名實滿
山東自有五都相非無四世公臨窓驚白日倚
匣曳輕虹願持鷩鷩羽歲暮依梧桐

客子慘無歡送別江之干白雲方漣漣黃鳥尚
關關糾紛巫山石合沓洞庭瀾行衣侵曉露征
舳犯夜湍無因停合浦見此去一作玄珠還
樹響浹山來猿一作溪聲繞岫惡旅帆風飄揚行
車露沾濕深浪聞蕪葭濃雲沒城邑不見別離
人獨有相思泣

酬別江主簿屯騎

有客告將離贈言重蘭蕙泛舟當泛濟結交當
結桂濟水有清源桂樹多芳根毛公與朱亥俱

在信陵門趙瑟鳳凰柱吳醵金罍樽我有北山
志留連爲報恩夫君皆逸翮搏景復凌鸞白雲
閒海樹秋日暗平原寒蟲鳴趯趯落葉飛翩翩
何用贈分首自有北堂萱

酬別

故人杯酒別天清明月亮露下寒葭中風起秋
江上衣染潺湲淚棹犯參差浪七首直千金七
寶雕華裝

側亮反

生離何用表賴此持相餉

贈別新林

一作江潭怨

僕本幽并兒抱劍事邊陲風亂青絲絡霧染黃
金羈天子旣無賞公卿竟不知去去歸去來還
傾鸚鵡杯氣爲故交絕心爲新知開但令寸心
是何須銅雀臺

發湘州贈親故別三首

相送出江潯淚下沾衣襟何用敘離別臨岐贈
好音敬通才如此君山學復深明哲途無賞文
華空見沈古來非一日無事更勞心

雲生曉靄靄花落夜霏霏問余何意別答言倦

遊歸徒勞易水布空負洛陽衣懷金無人別抱
玉遂成非安得久留滯商山饒白薇

君留朱門裏我至廣江濱城高望猶見風多聽
不聞流蘋方繞繞落葉向一作尚紛紛無由得共

賞山川間白雲

同柳吳興烏亭集送柳舍人

河陽一悵望南浦送將歸雲山離曉曉花霧共
依霏流連百舌啼下上陽禽飛桂舟無淹柅玉
軫有離徽願君嗣蘭杜時采東臯薇

同柳吳興何山集送劉餘杭

王孫重離別置酒峰之巖逶迤川上草參差澗
裏薇輕雲紉逵岫細雨沐單衣簷端水禽息
上野螢飛君隨綠波逵我逐清風歸

送柳吳興竹亭集

平原不可望波瀾千里直夕魚汀下戲暮雨簷
中息白雲時去來青峰復負側躑躅牛羊下晦
昧嶮巖色王孫猶未歸且聽西光匿

初至壽春作

易學詩集 卷二
桓譚不賣交馮子任紆直浮溺逐波影飄揚恣
風力壯州少知舊南陽寡相識中駕每傾輪當
騫復推翼望美無津梁私自憐何極

登壽陽八公山

逵澗自傾曲石漱復戔戔含珠岸恒翠懷玉浪
多圓疎峰時吐月密樹不開天瑤繩盡玄秘金
檢上奇篇是有琴高者陵波去水仙

壽陽還與親故別

故人來送別帳酒臨行阡露繁秋色慢氣愴聽

聲煎鴈渡章華國葉亂洞庭天復有向隅淚中
腸皆涕漣但願千丈松結景雲之峰山高日攀
早枝多風彩重我還愛芳杜君住揖驪龍

邊城將四首

塞外何紛紛胡騎欲成群爾時始應募來投霍
冠軍刀含四尺影劍抱七星文袖間血灑地車
中旌拂雲輕軀如未殞終當厚報君

僕本邊城將馳射靈關下箭銜鴈門石氣振武
安瓦勲輕賞廢丘名高拜橫野留書應鑿楹傳

功湏勒社徒傾七尺命酬恩終自寡

聞君報一餐遠送出平野玉標丹霞劒金絡
光馬高旗入漢飛長鞭歷地寫曙星海中出曉
月山頭下歲晏坐論功自有思臣者

臨淄重蹴踘曲城好擊刺不要身後名專聘眼
前智君看班定遠立功不負義掣拽二丈旗躑
躑雙鳬騎但問相知否死生無險易

秋念

團團珠暉轉炤炤漢陰移箕風入桂露璧月滿

瑤池樹青草未落蟬涼葉已危
還深長夜想顧
憶臨邛卮芳杜果蕪沒纓帶欲何爲

春怨

四時如湍水飛奔兢迴復夜鳥響嚶嚶朝花照
煜煜厭見花成子多看筍成一作爲竹萬里斷音

書十載異棲宿積愁落芳鬢長啼壞美目君去
往榆關妾留住函谷唯對音邪房如愧蜘蛛屋
獨喚響相酬還持影自逐象牀易氍毹羅衣變
單襖幾過度風霜猶能保乳獨

采藥大布山

我本壯山壯緣澗采山麻九莖日反

一作照三間

藥長生花可用蠲憂疾聊持駐景斜景斜不可
駐年來果如驅安得崑崙山偃蹇三珠樹三珠
始結芰絳葉凌朱臺玉壺白鳳肺金鼎青龍胎
韓衆及王子何世無仙才安期儻欲顧相見在
蓬萊

贈周散騎興嗣二首

子雲好飲酒家在成都縣製賦已百篇彈琴復

千尋鐵通不富豪相如本貧賤共作失職人
包
出
一
相
見

晉一作

賢當路者聲名振華夏朱輪玳瑁車紫

韉連錢馬朝花舞風中夜月窺牕下想君貴易
朋居然應見舍

贈周興嗣四首

孺子賤而貧且非席上珍唯安萊蕪醢兼慕林
宗巾百年逢繼綖千里遇殷勤願持江南蕙以
贈生芻人

思君欲何言中心亂如霧淚下非一端愁來誰
有數子爲馮敬通不減汲長孺千里無關梁安
得王喬履

與君初相知不言異一宿意欲褰衣裳陰雲亂
人目之子伏高卧伊予空杼軸無因渡淇水見
此猗猗竹

可怨思公子終自不敢言青松蔽南隴白雲生
北園沈憂無人語默念空憑軒安得湛盧劍以
報相知恩

周興嗣答吳均詩三首附

明燧照暗室邊韶對趙壹但酌中山酒唯其
江浦禱風動雲入箕雨至月離畢王丹贈不
拜是我相知日

驚鳥起北海儀鳳飛上林騫低不同翼歡楚
亦殊音噫噫夕雲起落落落曉星沈李陵報蘇
武但令知我心

昔別襄城村同會長安市誰學萊蕪餽本得
王喬履堦前養素鶴池巾飴赤鯉一往玉壺

上蕪復見蕭史

入蘭臺贈王治書僧孺

故人揚子雲校書麟閣下寂寞少交遊紛綸富
文雅予爲隴西使寓居洛陽社相思非不深行
行避驄馬

江上酬鮑幾

振棹出江湄依依望九疑欲謁蒼梧帝過問沅
湘姬折荷縫作蓋落羽紡成絲吾行別有意不
爲君道之

贈柳秘書

靡蕪與丹桂奇心復奇骨已蔽蒼龍門又影鳳
皇闕紫雲依夜來清風扶晚發鴛鴦若上天寄
聲謝明月

詣周丞不值因贈此詩

竹枝任風轉蘭心逐風卷青雲葉上團白露花
中泫聞君入騎疎聊寄錦中書一隨平原客盍
憶豫章徐

遥贈周承

巨石亂天涯雜樹鬱參差伯魚留蜀郡長房還
葛陂練練波中月亭亭雲上枝高岑蔽人者無
處得相知

周承未還重贈

石渠閭無人子雲今何在顧望獨懷憂銜杯竟
誰待散雪逐吹寒蓬姿浮霜采甘泉無竹花鵲
雛欲還海

贈王桂陽

松生數寸時遂爲草所沒未見籠雲心誰知負

雲骨弱幹可摧殘
鐵莖易凌忽何當
數千尺爲君覆明月

酬郭臨丞

聞君立名義我亦倦晨征
馬在城上蹀劍自腰中
鳴白日遼川暗黃塵隴坻
驚願君但銜酒深知有素誠

憶費昶

皎皎日將上獵獵起微風
山沒清波內帆在浮雲中
直趣珠星北斜開碧海東
故人若思我當

念離根蓬

酬聞人侍郎別三首

悵然心不樂萬里向悠悠
凌朝憇枉渚薄暮遵江洲
君住青門上我發霸陵頭
相思自有處春風明月樓

整棹北川湄迴首望城邑
林疎風至少山高雲度
意興懷萬里心各作千行泣
欲見終無緣思君空佇立

舉首川之折

當作

離鴻四向飛子憐三湘薛我

憶五陵薇但使同嘉遁何必共輕肥思君美如玉不覺淚沾衣

贈鮑春陵別

落葉思紛紛蟬聲猶可聞水中千丈月山上萬重雲海鴻來倏去林花合復分所憂別離意白露下霑裙

別王謙

嚴光不逐世流轉任飛蓬欲還天台嶺不狎其泉宮離歌玉絃絕別酒金卮空倘遺故人念僕

在東山東

奉使廬陵

悵然不自怡
端憂坐漠漠
風惡鴈毛斷
冰堅馬蹄落
客子饑寒多
江上衣裝薄
何當報恩罷
驅車還北郭

迎柳吳興道中

團團日西靡
客念已蹉跎
長風倒危葉
輕練細寒波
白雲光彩麗
青松意氣多
所言飽恩德
忘我壯田蘿

銘

平等剎下銘有亭

香薪已燎花疊盡然頻果絕其軟言綿毫收其
廣照糾鉢遺采託慕所依紅爪餘暉申悲是寄
因使金表爭構玉剎競脩豈止天界飾其四圍
龍宮陳其七寶樹似菴林峯疑驚色孕吐仙霧
湧漱靈泉燕室緣雲精廬切漢制蕪秘殿采美
御房義和假道於朶怱翔鸞廻翼於飛棟建章
厭勝未及雕甍甘泉避暑豈窮輪奐檻綴玫瑰

階填粟玉絡以如意飾用沉檀火齊勝明燭銀
颺采釋梵奪其身光日車貶其輪照辭曰

惟茲寶塔妙跡可傳盤稱鄴境樓美涪川雙龍
虛繞九鳳徒懸豈如神刹耿介凌煙珠含魄月
幡垂淨天寶鐸夜響銀地朝鮮檐棲迥霧砌卷
香蓮翻蠡下梵陞鶴歸仙洹沙擾擾世界綿綿
踐茲勝影祛彼蓋纏

吳朝請集卷之三

梁吳興吳均叔庠著

明閩漳張燮紹和纂

詩

至湘洲望南嶽

重波淪且直連山斜復紛鳥飛不復見風聲猶
可聞隴隴樹裏月飄飄水上雲長安遠如此無
緣得報君

登二妃廟

朝雲亂人目帝女湘川宿折齒巫山下采荇渥
庭腹故以輕薄好千里命艫舳何事非相思江
上葳蕤竹

詠懷二首

僕本報恩人走馬救東秦黃龍暗迢遞青泥寒
苦辛野戰劍鋒盡攻城才智貧唯餘一死在留
持贈主人

元叔勢位卑長卿宦情寡二頃且營田三錢聊
飲馬懸風白雲上挂月青山下心中欲有言未

得忘言者

古意七首

雜虜寇銅鑊征役去三齊扶山剪疏勒傍海掃
沈黎劍光夜揮電馬汗晝成泥何當見天子畫
地取關西

匈奴數欲盡僕在玉門關蓮花穿劍鏑秋月掩
刀環春機思窮宛戛鳥鳴綿蠻中人坐相望狂
夫終未還

西都盛冠蓋九達塵霧塞中有惡少年伎能專

自得玉鞭蓮花鰓金芒流星勒聊爲路傍人寫
鞚長檣壯

賤妾思不堪採桑渭城南帶減連枝繡髮亂鳳

皇簪

一作簪

花舞依長薄蛾

一作鵝

飛愛綠潭無由

報君信流涕向春蠶

英華題云和蕭洗馬古意

妾本倡家女出入魏王宮旣得承瑀輦亦在更

衣中蓮花銜青雀寶粟鈿金蟲猶言不得意流

涕憶遼東

何處報君書隴右五岐路泪研兔枝墨筆染鴉

毛素碧浮盃渚水香下洞庭路應歸遂不歸芳
春空擲度

妾家橫塘北發豔小長干花釵玉宛轉珠繩金

絡繹

一作九

幕歷懸丹

一作青

鳳透遙搖白團誰能

分見此含恨不能言

一作誰堪久見此含恨不相看

閨怨二首

胡笳屢悽斷征蓬未肯還妾坐江之介君茂小
長安相去三千里參商書信難四時無人見誰
復重羅紈

芳草可攬結妾心正斷絕綠鬢愁中改紅顏啼

裏滅非獨淚成珠亦見珠成血願爲飛鵲一作雙鵲

鏡翩翩照離別玉臺作古意

去妾贈前夫

去妾在河橋相思復相遼鳳皇簪落髮蓮花帶

緩腰腸從別處斷貌在淚中消願君憶疇昔片

言時見饒

詠少年

董生唯巧笑子都信美目百萬市一言千金買

相逐不道參差菜誰論窈窕淑願言捧繡被來
就越人宿

詠雪

微風搖庭樹細雪下簾隙
紫空如霧轉凝階似
花積不見楊柳春徒看
桂枝白零淚無人道相
思空何益

雪

雪逐春風來過集巫山野
瀾漫雖可愛悠一作翻
揚詎堪把問君何所思
昔日同心者坐湏風雪

少章詩集卷三
四
齊相期洛城下

春詠

春從何處來拂水復驚梅雲障青瑣闌風吹承
露臺美人隔千里羅幃閉不開無由得共語空
對相思杯

共賦韻詠庭中桐

龍門有奇價自言梧桐枝華暉實掩映細葉能
披離不降周王子空待歲時移嚴風忽交勁遂
使無人知

詠柳

細柳主堂北長風發鴈門秋霜常振葉春露詎
濡根朝作離蟬宇暮成宿鳥園不爲君所愛推
折當何言

主人池前鶴

本自乘軒者爲君階下禽推藏多好貌清咲有
奇音稻梁惠旣重華池遇亦深懷恩未忍去非
無江海心

寶劍

我有一寶劍出自昆吾溪照人如照水切玉如
切泥鏐邊霜凜凜匣上風淒淒寄語張公子何
當來見携

詠燈

昔在鳳皇闕七采蓮花莖陸離看寶帳爛熳照
文屏檐豔烟光轉氛氲霧裏輕能方三五夜桂
樹月中生

別夏侯故章

白馬黃金羈青驪紫絲鞵新知關山別故人河

樂送置此一函書爲余達雲夢

以服散鎗贈殷鈞

玉鉉有交交金丹煥仙說九沸翻成緩七轉良
焉切執以代疏麻長貽故人別

梅花

悔性本輕蕩世人相陵賤故作負霜集作雪花欲
使綺羅見但願深相知當作早摧非所戀

征客

公卿來帳別葭聲在狹斜玉樽浮雲蓋朱輪流

水車韆中懸明月，
劍杪照蓮花。

雜句四首

晝蟬已傷念，
夜露復沾衣。
昔別曾何道，
今夕螢光飛。

錦腰連枝滴

一作理

繡領合歡斜，
夢中誰不見終。

成亂眼花

蜘蛛簷下挂，
絡緯井邊啼。
何曾得見子，
照鏡牕東西。

泣聽離夕歌，
悲銜別時酒。
自從今日去，
當復相。

思否

山中雜詩三首

山際見來煙竹中
窺落日鳥向簷上飛
雲從牕裏出

綠竹可充食
女蘿可代裙
山中自有宅
桂樹籠青雲

具區窮地險
嵒山萬里餘
奈何梁隱士
一去無還書

詠雲一首

飄飄上碧虛
藹藹隱青林
氛氲如有意
縈鬱詎無心

白雲蒼梧來
過拂章華臺
逢河散復卷
經風合且開

詠慈姥磯石上松

根爲石所蟠
枝爲風所碎
賴我有貞心
終凌細草輩

送呂外兵

白雲浮海際
明月落河濱
送君長太息
徒使淚

沾巾

傷友

可憐桂樹枝懷芳君不知
摧折寒山裏遂死無人窺

表

爲建安讓加司徒表

臣聞玄黃之馬事絕於銜鑣蟠朽之材飾華於
丹漆何則千里之志已窮萬乘之器無取遠物
近身於焉在譬

書

與朱元思書

風煙俱淨天山共色從流飄蕩任意東西自富
陽至桐廬一百許里奇山異水天下獨絕水皆
縹碧千丈見底游魚細石直視無礙急湍甚箭
猛浪若奔夾峰高山皆生寒樹負勢競上牙相
軒邈爭高直指千百成峰泉水激石泠泠作響
好鳥相鳴嚶嚶成韻蟬則千轉不窮猿則百叫
無絕鸛飛戾天者望峰息心經綸世務者窺谷

忘反橫柯上蔽在晝猶昏疎條交映有時見日

與顧章書

僕去月謝病還覓薛蘿梅溪之西有石門山者
森立爭霞抵峰限日幽岫含雲深谿蓄翠蟬吟
鶴唳水響猿啼英英相雜綿綿成韻旣素重幽
居遂葺宇其上幸富菊花偏饒竹實山谷所資
於斯已辦仁智所樂豈徒語哉

與施從事書

故鄆縣東三十五里有青山絕壁干天孤峰入
漢綠嶂百重清川萬轉歸飛之鳥千翼競來企
水之猿百臂相接秋露爲霜春蘿被逕風雨如
晦鷄鳴不已信足蕩累頤物悟衷散賞

檄

檄江神責閻穆王壁文

昔穆王南巡自郢徂閩遺我文壁念曰此津貫
緯百紀薦歷千春念茲文壁故閩水濱江漢勗
之自求多益及我名瑞躍此華壁則實有漢川
世爲江伯如有負穢心迷懷黷情臧藏玉泥中
匿珪魚腹使公孫躡波而長吁子羽濟川而怒
目伏飛舞劍而東臨菑丘躍馬而南逐打素蛤
而爲粉碎紫貝其如粥又有川人勇俊處乎閩

濮水居百里泥行萬宿右睨而河傾左咤而海
覆乃把昆吾之銅純鉤之鐵被魚鱗之衣赴螺
蚌之穴引澍東隅移焦比島使蓬萊之根鬱而
生塵瀛洲之足淨而可掃按驪龍取其領下之
珠擲鯨魚拔其眼中之寶皇恩所被繁枯潤涸
威之所加窮河絕漠願子三思反此明玉

食移

月光離羣風氣入箕細雨如網細柳如絲離隔
東西之怨眺望山川之阻企龍門而不見覽桂
枝而延佇此乃方寸之恒情羗難得而覩縷也
亦有鮑叔分財華歆讓位乃相知於平生實忘
懷於寤寐雞有呼群之德鹿有食草之美在微
物其尚然况仁義之君子哉今足下居則廣夏
高堂連闥洞房綺窓半卷屏風角張指天地如
一指安知故人之可傷一死一生乃知交情一

貴一賤交情乃見調古昔之恒談在今日而方
見嗚呼如何忘我實多輒欲彈琴縱酒於首陽
之阿君有厨中腐肉而僕不厭糟糠君有鴈鷺
之食而余不得一嘗願以小人之腹爲君子之
腸何如哉今欲君之餘江臯綠施之荀洞庭紫
鬣之魚昆山龍胎之脯玄圃鳳足之殖千里萼
羹萬丈名膾氣馨若蘭色美如艾扶南甘蔗一
丈三節白日炙之便銷清風吹之卽折安定之
梨皮薄味厚一歲三花一枚二十九厥上味惟

君能施君若不施成君深累於神爲不祥於人
爲僊義

說

餅說

宋公至長安得姚泓時故大官丞程季者了了人也公曰今日之食何者寘先季曰仲秋禦景離蟬欲靜熒熒曉風淒淒夜冷臣當此景唯能說餅公曰善季乃稱曰安定噎鳩之麥洛陽董德之磨河東長若之葱隴西舐背之犢枹罕赤髓之羊張掖北門之豉然以銀屑煎以金銚洞庭負霜之橘仇池連蒂之椒調以濟北之鹽劉

以新豐之鷄細如華山之玉屑白如梁甫之銀
泥既聞香而口悶亦見色而心迷公曰善

連珠

連珠二首

蓋聞豔麗居身而以蛾眉入妬貞華炤物而以
絕等見猜是以班姬辭寵非無妖冶之色揚子
寂寞豈乏炫曜之才

蓋聞義夫投節未必識君烈士赴危非期要利
是以墨子縈帶不蒙肉食之謀申胥泣血非有
執圭之位

附錄

吳均傳

陳姚察

吳均字叔庠吳興故鄣人也家世寒賤至均好學有俊才沈約嘗見均文頗相稱賞天監初柳惔爲吳興召補主簿日引與賦詩均文體清拔有古氣好事者或教之謂吳均體建安王偉爲揚州引兼記室掌文翰王遷江州補國侍郎兼府城局還除奉朝請先是均表求撰齊春秋書成奏之高祖以其書不實使中書舍人劉之遴

吳朝請集

附錄

詰問數條竟支離無對敕付省焚之坐免職尋
有敕召見使撰通史起三皇訖齊代均草本紀
世家功已畢唯列傳未就普通元年卒時年五
十二均注范曄後漢書九十卷著齊春秋三十
卷廟記十卷十二州記十六卷錢唐先賢傳五
卷續文釋五卷文集二十卷

吳均傳

唐李延壽

吳均字叔庠吳興故鄣人也家世寒賤至均好學有俊才沈約嘗見均文頗相稱賞梁天監初鄒暉爲吳興召補主簿日引與賦詩均文體清拔有古氣好事者或教之謂爲吳均體均嘗不得意贈暉詩而去久之復來暉遇之如故弗之憾也薦之臨川靖惠王王稱之於武帝卽日召入賦詩悅焉待詔著作累遷奉朝請先是均將著史以自名欲撰齊書求借齊起居注及群臣

行狀武帝不許遂私撰齊春秋奏之書稱帝爲
齊明帝佐命帝惡其實錄以其書不實使中書
舍人劉之遴詰問數十條竟支離無對敕付省
焚之坐免職尋有敕召見使撰通史起三皇迄
齊代均草本紀世家已畢唯列傳未就卒均注
范曄後漢書九十卷著齊春秋二十卷廟記十
卷十二州記十六卷錢塘先賢傳五卷續文釋
五卷文集二十卷

和吳主簿六首

梁王筠

春日二首

日照鴛鴦殿萍生鴈鷺池游塵隨影入弱柳帶
風垂青鶻逐黃口別鶴慘羈雌同衾遠遊說結
愛久相離於今方溘死寧湏萱草枝

菴蔬心未發薜蘿葉欲齊春蠶方曳緒新燕正
銜泥野雉呼雌雉庭禽挾子棲從君客梁後方
晝掩春閨山川隔道里芳草徒萋萋

秋夜二首

九重依夜館四壁慘無暉招搖顧西落烏鵲向
東飛流螢漸收火絡緯欲催機爾時思錦字持
製行人衣所望丹心達嘉客倘能歸

露華初泥泥桂枝行棟棟煞氣下重軒輕陰滿
四屋別寵增修夜遠征悲獨宿愁牽翠羽眉淚
滿橫波目長門絕往來含情空杼軸

遊望二首

落日照紅粧挾瑟當窻牖寧復歌薜蘿唯聞歎
楊柳結好在同心離別由衆口徒設露葵羹誰

酌蘭英酒會日杳無期薜蘿安得久
相思不安席聯至狹斜東愁眉儼廐里高髻學
城中雙眉偏照日獨蒞好縈風自知心所愛獻
賦甘泉宮傳聞方鼎食詎憶春闈客

遺事

吳均有才器常爲劍騎詩云何當見天子畫地
取關西高祖謂曰天子今見關西安在均默然

集評

吳均嘗爲詩云秋風瀧白水鴈足印黃沙沈隱
侯約語之曰印黃沙語太險均曰亦見公詩云
櫻發欲然約曰我始欲然卽已印訖

談藪

吳均孔珪古之狂者也其文怪以怒

文中子

糾謬

巖棲賦

感玄聖之垂訓，暫已親而名疎。言可放而從默，身應卷而忽舒。爰鷦鷯之巢林，在一枝而有餘。性所悅而難違，託茲山以結廬。果棲遲而我愜，卽逍遙之靈墟。觀其繚崇巒，橫峻谷，激泌泉，羅森木。後巍峩以縈糾，前參差而聳伏。追陰壑之夏涼，偃陽崖之冬燠。美勁節於松筠，翫幽芳於蘭菊。虛籟清耳，閒雲瑩目。因海鶴以驚夜，任鵝

雞以知旭慮靜於無擾神恬於寡慾於是歌考
繫於詩人諷嘉遁於大易達浮俗之險艱消毀
譽之損益蹈方外之坦途信可免於競惕旣卽
陰以息影由不行而滅跡雖區中之未計寔世
途之良策人所棄而已收故處約而恒適覽無
見以收眦聽無聲以黜聰餘匪專於旨酒樂矣
必於絲桐焚清香以練氣啓玉檢而擊蒙期遺
滯於昭曠庶近真於感通鑒太虛之有象覆妙
用之非空朝天甚簡採藥多暇形猶資於吐納

意已送於將逝知道無廢興而物有存亡
生而常生體化宗而不化蕭蕭絕塵境誰與
鄰而遠而朋遊益曠機忘而鳥獸可馴韻靡叶
於當時心常依於古人仰由皓之逸軌詠羲農
之化淳師黃老之玄奧友松喬之道真慙無功
之遠物良獨善於吾身祇所幸其自得敢韜精
於隱淪

竹賦

惟坤靈之播育何備物之寔繁偉茲竹之標擬

得造化之清源契道合靈表貞示節葉森散以
翠錯莖鮮修而瓊潔爾其飀風流暢萬彙昭陳
揚葩蘚其密苑萋柳藹於通津不郁馥以啓曜
但葳蕤而有筠亦未知爲異也至如殺氣凌厲
凝霜蕭瑟覽平楚之蒼茫窺衆林其如失昂冰
霜之涸沍逾青熒以鬱密則殊可重焉故詩曰
如苞書稱厥貢倚茲淇園美彼雲夢昔在軒后
肇官陰陽俾伶倫於嶰谷伐修竹之珍篁裁六
律以協氣調八風而順常然後成箏簫以備樂

其聲濫而彌長笙鏞以間鳥獸踰踰諒自樂之
純粹曷群材之可方若乃渭川千畝山陽數林
會稽方潤於碧玉羅浮比色於黃金上點點以
雲翳下冷冷而鳳唵祛赫曦之燠景納淒涼之
清陰王子所以嘯詠稽生爲之幽尋召嘉賓及
令友暢綠醞與鳴琴美遊盤之逸趣清寂寞之
遠心若乃夾滄江倚丹嶸蓄水霧之沉沉搖巖
煙之漠漠湘妃有揮涕之感楚謠興防露之作
或挺鼓吹之嶽峯或垂天門之旁薄皆鸞鳳之

所翔集孔翠之所棲託豈獨嬋娟於廣漠之壤
亦有璀璨於蓬萊之峰結實珠粒敷花紫茸拂
皓絮以飛雪摧緝莖以韻鐘故列僊之攸翫匪
吾人之所從也亦有化雉吳國成龍葛陂客人
負簫育蟲桃枝一笄明其胤嗣三節獲乎嬰兒
榮燈纂以感孝茂憲樞以表奇慧家壇以塵滅
環石牀以陰滋皆靈變之譎怪良難得而備知
爾其衆彙非一則有策筭筭曼射筒絲筭籥簫
籥筭之肅蟲龍鍾雲母之扶疎箬箭浮色以標

爛自饒絳文而繡攄方志之所遺載山經之所
闕書安可得而詳矣靡不勁堅其性慈精厥色
不規而圓不操而直故高皇製冠以守位孝文
剖符以表職博望侯傳於大夏之外穆天子樹
於玄池之側推此類以彌廣匪斯文之可極也
梁吳均名均唐吳筠名筠自藝文誤書梁人
爲吳筠世間讀史者少二名遂混雜不可辨
近來賦苑文儷輒誤收唐人賦爲梁人賦茲
爲摘出明載備考淄澠可以永分耳